

DEO OPTIMO MAXIMO VNI ET TRINO. VIRGINI DEIPARÆ
ET SANCTO LVCÆ ORTHODOXORVM MEDICORVM PATRONO.

QVÆSTIO MEDICA
CARDINALITIIS DISPVATIONIBVS MANE DISCVTIENDA
IN SCHOLIS MEDICORVM, DIE IOVIS V. MARTII.
M. NICOLAO MATTHIEV, Doctore Medico, moderatore.

Est-ne infantilis pulicula salubris?

912

NON est viuere, sed valere, vita: hæc vt sanitate; sic sanitas alimentis conseruanda. Calor natiuus (elementaris) vitam dum moderatur, triplicem corporis substantiam, suæ conseruationi studens, depopulando, quasi parasitus quispiam suo succo viuuit, si conueniens *ἐνέχυμα* desit, alimentum putà, quod licet vbique naturæ amicum, varium tamen secundum ætates, anni tempestates, temperamenta & climata vnicuique diuidendum: ex illius vitio aut vtendi praua ratione, morbi *σπορὰν* pestilentibus grauiores sobolescunt; nōne sicciora alimenta Septentrionalibus, Meridionalibus humidiora, pituitosis calidiora, frigidiora biliosis salubria? Non minùs *ἐνέχυμα* rustici, quàm *δοσιμέτρως* vrbanī delicatesiores læduntur. Autumno quàm vere pauciora ingerantur, frigidiora æstate quàm hyeme. Senes faciliè ieiunium ferunt, minùs adolescentes, minime omnium pueri. Consuetudini aliquid tribuendum: paulò etiam deterior cibus sed iucundior præferendus.

CVM sit immensa alimentorum seges ac varietas (nihil enim intactum relinquimus, si metalla, medicamenta; elementa & venena excipias) multum refert qua arte vsurpentur; fatalem enim metam tardius aut celerius attingimus, prout medicas viuendi leges seruamus, aut contemnimus. Nihil is delinquet, qui ex sanitatis studio & medicinæ præceptis salubre, insalubre, euchymum, cacochymum, eupeptum, dyspeptum, polytrophum diligenter discernet. Qui simplex vario & miscello salubrius negat, sit *δοσιμέτρως*. Qui animalium carnes non attingunt, nimium fastidiosi. Volucres quadrupedibus anteponendæ. Vis esse breuioris vitæ? sint tibi imbecilles cibi, quales ex plantis reperere licet. Dum Sol ad nos redit, incunte vere, calore vegetiore facto, est-ne senibus & adolescentibus salubris *ἡχθροφάγος*? salubris *μυρσίνη*? cum inter animalia pisces infimo planè sint loco.

INFANTES recens natos adolescentibus calidiores cibus humidis & liquidis alit optimus dieteticus, non omnibus tamen; vinum ipsis venenum est, nec aqua conueniens, etiam pluuiæ, quam inter potabiles optimam non putamus. Nocent omnia placentarum genera. Idoneum quæris alimentum? lac est, non camelinum, non equinum, non ouillum, mallem capinum quàm vaccinum; suillum, vt crudum & aqueum reiciimus. Exulent oxygala, melca, aphrogala, colostrum, protogala, schiston. Primas tenet humanum, maternum maximè, non tamen semper exhibendum; hoc paulò deterius altero quouis salubrius calori infantium halituoso & organis humidis analogum, vt facile coquitur, ita ex eo purior & laudabilior succus gignitur, hinc pauciora excrementa, celerius vt distribuitur, egregiè triplicis substantiæ iacturam reparat, & incrementum citius promouet.

SI lac matri defuerit, ne puerulus suo genio defraudetur, veniet in subsidium nutrix, matri quantum poterit fieri similis, nulli morbo obnoxia, ætate inter vigesimum & trigesimum annum constituta, quæ pectore sit amplo, medio inter obesum & gracilem habitu, mammis mediocriter extuberantibus, non laxis, non propendebentibus, sed duriusculis, per quas venæ multiplices deriuentur, papillis neque coniuuentibus, neque auersis, sed moderatè roseo colore eminentibus. Nōne & infanti magnum accedet commodum, si nutrix non multò antè pepererit, majusque si masculum, atque vt bonis moribus, sic & ingenio sit hilari? omnia perbellè habent, si lac suæ consistentiæ, copiâ, candore, odore, sapore fuerit moderatum: tale autem probatur, si in vnguem instillatum, neque subito neque tardius diffuat: vis habere porro omnes bonitatis quæ requiruntur dotes: tum deprehendes, cum illi in vas vitreum infuso, tantulum myrrhæ admiscueris, atque digitis agitari iusseris; si enim cum subsederit, plus casci quàm feri non reperias, probatissimum affirmare ne dubites.

SICVT cibus humidus ex solo lacte materno aut nutricis infantibus recens natis confert, eosque innoxie nutrit, vt qui nullo penè negotio excoctus venulas quantumvis exiles permeat: ita solidiora vt Narbonensium panatella, Hispanorum polenta, Septentrionalium cereuisiata, nostra etiam pulicula, quam triticam farinam cum lacte vaccino & sale coctam dicimus, ipsis noxia: quælibet enim grauis, crassa, viscosa, sterculenta, quæ vt ægre coquitur, venas & viscera obstruit, grauât stomachum, aluum sistit, crudos, lentos, & mucosos succos in toto corpore accumulât: hinc copiosa morborum illiadi materia suggeritur: hinc macies, febrium hecticarum comes, intestinorum cruciatus, totius abdominis tumor insignis, lienes magni, hepatis durities, morbi cutanei, variolæ, morbilli, lumbricorum generatio, calculi, vomitus, apud Narbonenses in humeris & lumbis obseruata diris cruciatibus molesta *τενέσις*. Hispanorum strumæ, Germanorum & Anglorum scorbutus, hinc pluribus mors præmatura; quod si quis fortunatior non ear ad plures, mirum si non sit crasso & obtuso ingenio.

Ergo infantilis pulicula non salubris.



Proponebat Lutetiæ IOANNES GARBE Laudunensis. A. R. S. H. M. DC. XLIII.

Hygi